

Heoi ko nga tikanga katoa o te moana meake nei rangona nuitia ai. Kia tu te Poari o Ngati Tuwharetoa ka panuitia ai ona whakariterite katoa i waenganui i nga Maori me te Kawanatanga. Heoi ra e te Etita ka mutu nei nga kupu e taea e au te tuku atu hei taonga mo Te Toa Takitini ki nga marae e takahi ai tona waewae. E te Etita e kore e mutu te mahara me te kororia, me te tuku inoi aku a te Katorika mo te Hon. A. T. Ngata me te Hon. Ta Maui Pomare me ta raua tamaiti me Te Rauamo. Ma te Atua ratou e tohu. E te Atua tohungia hoki te Kingi.

Na Te Taite Te Tono.

Box 114.

Kakariki, Halecombe.

HE NEEHI MO TAMATEA KAUNIHERA.

MANAAKI A WHANGANUI.

KUA whiwhi te Takiwa Kaunihera o Tamatea i tetahi Neehi tuturu mo ratou. Ko te Neehi nei he tino tiwhikete ona mo te mahi turoro me te Whakawhanau tamariki. Ko te mana whakabaere i a ia ko te mana o Te Tari o te Ora, engari ko etahi o nga mana o te Tari Ora kei te tapaea mai ki te Kaunihera o Tamatea.

I te mahi tikanga nga tangata o tenei rohe Kaunihera kia whiwhi ai te Neehi nei ki tetahi Motoka hei haereere tanga mona ki nga kainga Maori puta noa nga rohe o Tamatea Kaunihera.

He nui no te rongo pai o nga mahi a te ropu o Whanganui i haere nei ki te awhina i nga mahi a te Hahi i Akarana, karangatia ana tauna ropu kia haere tika mai ki Haki Pei nei mahi ai mo nga po e wha. Ko nga toenga atu o nga hereni ina ea nga rarururu me hawhe tonu, ko tetahi wahi hei manaaki i nga mahi o Whanganui, ara mo te whakataetae tenehi a te wa o te Aranga, a ko tetahi hawhe hei awhina i te Neehi o Tamatea Kaunihera. I runga i te aroha nui o Whanganui ki te pai o te manaaki a nga morehu o Heretaunga nei i a ratou, me te pai me te marama hoki o te take i tae mai ai ki Heretaunga nei, ka tu mai a Takarangī me tana whanau katoa, ka ki, me waiho katoa nga hereni o tenei mahi hei awhina i tenei mahi nui kia puta ai he painga ki nga turoro i nga wahi katoa o Heretaunga. I runga i tenei manaaki nui tera e whiwhi te Neehi nei ki tetahi Motoka hou tonu moana.

Kia nui nga ora ki a Whanganui i haere mai nei ki te awhina i a matou. Kua ea ra to koutou mauuitanga i te mea kua kite ake tera e rite te take i haeretia mai nei e koutou te nuku o te whenua. Kua whiwhi ra to matou Neehi ki tetahi Motoka mona. E ki ana te karaipiture. "Maka to taro ki te mata o nga wai, he maha nga ra ka hoki mai ano ki a koe."